

**■ COLUMNA**

# Il dentist ed il rumantsch grischun

DA CLAUDIA CADRUVI / ANR

Tgi va gugent tar il dentist? Ins pudess far ina retschertga scientifica per sclerir la dumonda. Jau sun persvadida ch'i vegniss a la glisch che nagin na va gugent tar il dentist. Curius fissi dentant, sch'ins concludess sin fundament d'ina tala retschertga: I na dovra nagins dentists pli, igl è da serrar las praticas, ins sto tadlar sin l'opiniun dal pievel.

Quai na raquint jau uss betg mo perquai ch'jau hai dad ir tar il dentist. Anzi, jau menziunesch quai pervi d'ina retschertga scientifica cun 31 Rumantschs e Rumantschas. Lezza ha mussà tranter auter ch'ils Rumantschs n'han betg gugent il rumantsch grischun. Gliez crai jau immediat. Jau avess schizunt cartì quai senza studi scientific. Problematic vegni dentant, sch'ins cumenza a far pretensiuns politicas sin fundament d'in tal studi. Per exempel: Igl è da franar l'introducziun dal rumantsch grischun en scola, la Lia Rumantscha sto reponder la strategia ed il chantun sto midar la politica da lingua. Tgi che fa talas pretensiuns sin fundament da quest studi, lez scumbeglia duas chaussas: Quai ch'il pievel ha gugent e la voluntad dal pievel. Gliez n'è numnadain betg il medem.



In auter exempel. Nagin Ina paja gugent taglia. Tuts han che rencrescha da dar mintg'onn daners al stadi – cunzunt jau. Durant emplenir or il cumond da pajar la taglia ma vegni mintga giada endament, tge ch'jau pudess far cun quests daners: bellezza vacanzas cun l'entira famiglia, cumprar in canapé cumadaivel u forsà tanschessi schizunt ina giada per in auto resch nov, empè da stuair sa cuntentar mo cun in'ocasiun. Tals patratgs han blers. Tuttina n'ha fin uss anc mai insatgi lantschè in'iniziativa populara per abolir las taglias communalas, chantunalas e federalas. Pertge?

Il stadi organisescha las scolas per tuts uffants, bajegia vias per in e scadin e procura cun la polizia e las dretgiras per segirtad e giustia. Senza taglia stuessan ins privatisar ils servetschs statals ed a la fin dals quints pajass la gronda part dals burgais dapli. Sch'jau stuess per exempel pajar scolas privatas per mes trais uffants, vegness

quai pli char che mes quint da taglia e probabel stuess jau lura betg mo renunziar sin l'auto resch nov, ma bain schizunt sin l'ocasiun.

Nagin na paja gugent taglia e tuttina è la taglia necessaria. Nagin na va gugent tar il dentist e tuttina datti rotschas da dentists che gudognan prima. Bunamain tuts Rumantschs han pli gugent l'idiom. Tuttina han fin uss quaranta vischnancas grischunas votà e decidì d'introducìr il rumantsch grischun en scola. Da 1327 persunas, ch'eran preschentadas a las radunanzas da vischnanca, han 1106 votà per l'introducziun da la lingua unificada – pia ina media 83 pertschient. En questas vischnancas dovran 320 scolars il rumantsch grischun en scola – davent da l'avust èsi già 450 scolars – ed ins n'auda strusch lamentaschuns. Quai fiss era ina tematica da perscrutaziun. U fissi forsà memia nunspectacular u memia banal, sche strusch insatgi sa lamenta.

P.S. En il fratemp sun jau stada tar il dentist. I n'ha gnanca fatg mal. Uss pos jau puspè mangiar cun gust. E dal reminent: Jau hai emprendì avant 14 onns rumantsch grischun. I n'ha betg fatg mal. Jau scriv oz cun gust rumantsch grischun e discurr perquai tuttina il pli gugent sursilvan.